



Informativni bilten Općine Maglaj



5/2023.

S A D R Ž A J

- Održana press konferencija povodom 51. Festivala „Studentsko ljeto“
- Održana 30. redovna sjednica Općinskog vijeća Maglaj
- Dunja Mihajlović i Stefan Lopandić pobjednici 51. Festivala „Studentsko ljeto“
- Svečano obilježen Dan općine Maglaj
- Općinski načelnik Maglaj čestitao rođendan djeci rođenoj na Dan općine
- Otvorena manifestacija „Septembarski dani otpora 92-95“
- Ambasador Japana u BiH posjetio općinu Maglaj
- Otvorena sportska sala u Mjesnoj zajednici Liješnica
- Zakazana 31. redovna sjednica Općinskog vijeća Maglaj



ODRŽANA PRESS KONFERENCIJA POVODOM 51. FESTIVALA „STUDENTSKO LJETO“

Press konferencija povodom 51. Festivala „Studentsko ljeto“ održana je 06.09.2023. godine. Festivalne večeri „Studentskog ljeta“ planirane su 8. i 9. septembra u Sportskoj dvorani Maglaj sa početkom u 19:30 sati.

Na festivalskoj pozornici predstaviti će se više od trideset mladih interpretatora iz Austrije, Slovenije, Hrvatske, Srbije, Crne Gore, Sjeverne Makedonije, te Bosne i Hercegovine.

O Festivalu su govorili Mirsad Mahmutagić, Općinski načelnik Maglaj i članovi Organizacionog odbora: Eldina Mehinagić, Josip Antunović, Benjamin Hasanić i Arnela Tumbić.

Mirsad Mahmutagić, Općinski načelnik Maglaj, dao je veliku podršku i povjerenje Organizacionom odboru.

„Svih ovih godina, kako se bliži termin održavanja 'Studentskog ljeta', raste i uzbuđenje. To je nešto što traje više od 50 godina, sigurno je da je u organizaciju uloženo puno, prije svega ljubavi, ali i energije. Uz vrhunske izvođače i sjajan orkestar vjerujem da nas očekuje fantastična atmosfera i ovo je prilika da pozovemo sve naše Maglajlije da u petak i subotu dođu u sportsku dvoranu. Hvala svim predhodnim generacijama koje su dale svoj doprinos u organizaciji Festivala, a posebno hvala Organizacionom odboru koji je i ove godine vrijedno radio, jer puno je posla i aktivnosti koje se rade 'u pozadini'. Plod njihovog višemjesečnog rada vidjeće naši sugrađani ali i gosti Maglaja ove dvije večeri“, rekao je Općinski načelnik Maglaj.

Muzički gosti Festivala su Esad Plavi i Denial Ahmetović, a voditelji će biti Maja Čengi i Miralem i Lejla Durmo.



ODRŽANA 30. REDOVNA SJEDNICA OPĆINSKOG VIJEĆA MAGLAJ

Trideseta redovna sjednica Općinskog vijeća Maglaj održana je 07.09.2023. godine. Prije usvajanja Dnevnog reda, dodana je nova tačka Rješenje o razrješenju predsjedavajuće Općinskog vijeća Maglaj.

Doneseno je Rješenje o razrješenju Svjetlane Zamboni dužnosti predsjedavajuće Općinskog vijeća Maglaj, a do imenovanja nove predsjedavajuće, funkciju će obavljati Aida Bašić, dopredsjedavajuća, u skladu sa članom 26. Poslovnika o radu Općinskog vijeća Maglaj.

Usvojena je Odluka o davanju prethodne saglasnosti za pokretanje postupka za dodjelu koncesionog prostora za istraživanje i eksploataciju mineralnog resursa lertzolita na ležištu „Klanci“ KO Strupina, općina Maglaj, sa izmjenama i dopunama koje je predložila vijećnica Aida Hadžić.

Također, usvojen je Nacrt Odluke o usvajanju djelimične izmjene Regulacionog plana „Novi Šeher“, po zahtjevu Pervan Zorana, Odluka o pristupanju djelimičnoj izmjeni Regulacionog plana „Omerdino Polje“, po zahtjevu Bećirović Sulje, Odluka o pristupanju djelimičnoj izmjeni Regulacionog plana „Novi Šeher“, po zahtjevu Budimir Marinka, Odluka o prihvatanju poklona nekretnine-zemljišta (po ponudi Omersoftić Aziza), Odluka o prodaji nekretnine neposrednom pogodbom Šahman (Hasib) Sadiku iz Maglaja, radi oblikovanja građevinske parcele, Odluka o davanju saglasnosti JP Elektroprivreda BiH dd Sarajevo, Podružnica Elektrodistribucija Zenica za izvođenje radova na polaganju podzemnog 0,4 kV kabla preko dijela nekretnine upisane kao javno dobro, kao i

Izvještaj o utrošku tekuće budžetske rezerve za period 01.01.-30.06.2023. godine.

U nastavku rada, vijećnici su usvojili Odluku o dodjeli javnih priznanja općine Maglaj za 2023. godinu. Ovogodišnji dobitnici javnog priznanja “Maglajska plaketa” su: Omer Egilmez, Generalni direktor kompanije “Natron-Hayat” i Općinski štab civilne zaštite Maglaj-Jedinica za sanaciju terena iz perioda 1992-1995. godine.

Periodični finansijski izvještaj Budžeta/Proračuna Općine Maglaj za period 01.01.-30.06.2023. godine, Informacija o stanju obrta, malog i srednjeg poduzetništva na općini Maglaj, Informacija o stanju u oblasti poljoprivrede na području općine Maglaj i Informacija o toku postupka imenovanju jednog člana Općinske izborne komisije Maglaj primljene su k znanju.

Općinsko vijeće Maglaj nije razmatralo Prijedlog Odluke o davanju saglasnosti za konačno imenovanje direktora Komunalnog javnog društva d.o.o. Maglaj i Prijedlog Zaključka o davanju ovlaštenja za potpisivanje Prijave za registraciju u postupku promjene lica ovlaštenog za zastupanje Komunalnog javnog društva d.o.o. Maglaj, kod nadležnog registarskog suda, zbog Dopisa Nadzornog odbora KJD d.o.o. Maglaj, broj: 01-1254-1-2-1/23 od 04.09.2023. godine.

Općinsko vijeće je Zaključkom zadužilo Nadzorni odbor KJD d.o.o. Maglaj da nastavi sa provođenjem procedure za izbor direktora u skladu sa zakonskim rokovima.

Prijedlog Odluke o izmjenama i dopunama Odluke o organizovanju/organiziranju općinskih službi za upravu Općine Maglaj i Davanje saglasnosti na Pravilnik o izmjenama i dopunama Pravilnika o

unutrašnjoj organizaciji službi za upravu Općine Maglaj vraćeni su na doradu.

Potrebnu većini nije dobila tačka Nacrta Odluke o usvajanju djelimične izmjene Regulacionog plana „Centar Maglaj-sjeverni dio“.

Na kraju sjednice, postavljena su vijećnička pitanja i pokrenute vijećničke inicijative.



DUNJA MIHAJLOVIĆ I STEFAN LOPANDIĆ POBJEDNICI FESTIVALSKIH VEČERI
51. „STUDENTSKOG LJETA“



Pobjednici Festivalskih večeri 51. „Studentskog ljeta“ su Dunja Mihajlović iz Beograda i Stefan Lopandić iz Doboja. Tokom dvije večeri, publici su se predstavila 32 interpretatora iz sedam različitih zemalja: Austrija, Slovenija, Hrvatska, Sjeverna Makedonija, Crna Gora i Bosna i Hercegovina.

Festival je otvorio Mirsad Mahmutagić, Općinski načelnik i uputio svima dobrodošlicu u Maglaj.

Na večeri narodne muzike svoj talenat su predstavili: Sena Habibija (Mostar), Đuzel Jeleč (Sarajevo), Andrijana Jovanović (Petrovac na Mlavi), Marko Martinović (Novska), Sara Bradarić (Maglaj), Petar Mitrović (Beč), Zoran Pavlović (Bratunac), Lučijano Šečić (Zagreb), Dunja Mihajlović (Beograd), Anđela Paležnica (Bosanski Šamac), Nikola Milenković (Beograd), Meris Karamustafić (Sarajevo), Amna Jusić (Tuzla), Marko

Križanović (Subotica) i Matea Brkić (Karlovac).

Prvu nagradu stručnog žirija osvojila je Dunja Mihajlović, drugu Matea Brkić, a treću Anđela Peležnica. Žiri novinara nagrade je dodijelio sljedećim: prvo mjesto Adna Dervišević, drugo mjesto Dunja Mihajlović i treće Zoran Pavlović. Nagrada „Selver Pašić“ za najbolju interpretaciju sevdalinke pripala je Amni Jusić.



Učesnici večeri zabavne muzike su bili: Ema Durić (Sarajevo), Adi Begić (Kakanj), Ognjen Zdravkoski (Skopje), Julian Veliss (Maribor), Marta Stanković (Vlasotince), Ajda Lacković (Kranj), Damjan Stoimenovski (Makedonska Kamenica), Anja Prodan (Prijevor),

Milorad Petrović (Jagodina), Adna Dervišević (Ilijaš), Divna Fores (Novi Sad), Marija Georgiev (Dimitrovgrad), Nikola Zaceski (Bitola), Emil Fetahović (Podgorica), Mite Stoilkov (Skopje), Bojan Lazin (Novi Sad) i Stefan Lopandić (Doboj).

Prvo mjesto stručnog žirija pripalo je Stefanu Lopandiću, drugo mjesto Julianu Veliss, a treće Adni Dervišević. Žiri novinara je odlučio da prvu nagradu dobije Adna Dervišević, drugu Adi Begić, a treću Mite Stoilkov.

Festivalski orkestar ove godine je brojao 27 članova pod rukovodstvom prof. Amira Muharemovića.

Tokom ovogodišnjeg Festivala Marjan Kataroski, predsjednik Svjetske asocijacije festivala i Mirsad Mahmutagić, Općinski načelnik Maglaj, potpisali su pristupnicu kojom je „Studentsko ljeto“, kao jedini festival iz BiH, postao dijelom asocijacije.

SVEČANO OBILJEŽEN DAN OPĆINE MAGLAJ



Obilježavanje Dana općine Maglaj započelo je u petak, 15.09.2023. godine zabavom za djecu, nakon čega je uslijedio Internacionalni turnir u sjedećoj odbojci „MAGLAJ OPEN 2023“ Sabahudin Borovčević Baho, a centralni događaj bila je današnja Svečana sjednica Općinskog vijeća Maglaj i Svečana akademija.



Na Svečanoj sjednici Općinskog vijeća o historiji Maglaja govorio je Safet Jašić, najstariji vijećnik, nakon čega su delegacije položile cvijeće na spomen-obilježja: Trg Alije Izetbegovića, spomen-obilježje prvom šehidu Rifatu Abidoviću, šehidsko mezarje Podborik, spomen-obilježje civilnim žrtvama rata, spomenik Čakalovac i spomen-obilježja u Novom Šeheru.



U prisustvu predstavnika Vlade Federacije BiH i Vlade Zeničko-dobojskog kantona, kao i predstavnika Općinskog vijeća Maglaj, religijskih zajednica, javnih ustanova i preduzeća, boračkih organizacija, kulture i sporta obratili su se Aida Bašić, dopredsjedavajuća Općinskog vijeća Maglaj i Mirsad Mahmutagić, Općinski načelnik Maglaj.

Aida Bašić, dopredsjedavajuća Općinskog vijeća Maglaj govorila je o ulozi Općinskog vijeća i unapređenju lokalne zajednice.

„I u narednom periodu će Općinsko vijeće Maglaj donoseći svoje strateške i druge

dokumente, dajući podršku kvalitetnim poslovnim i drugim inicijativama pojedinaca i kolektiva, te imajući u vidu nadležnosti koje su mu dodijeljene ustavima i zakonima biti aktivni pokretač i učesnik daljeg razvoja općine Maglaj“, istaknula je dopredsjedavajuća Općinskog vijeća Maglaj.

Mirsad Mahmutagić, Općinski načelnik Maglaj u svom obraćanju istaknuo je najvažnije projekte koji su realizovani na području općine Maglaj, te se zahvalio svima koji na bilo koji način doprinose unapređenju lokalne zajednice.

„Ponosim se našom općinom i napretkom koji je ostvaren posljednjih godina. Ispred nas je još mnogo rada i odricanja, ali zajedničkim snagama ova lokalna zajednica može i mora biti prepoznatljiva“, istaknuo je Općinski načelnik Maglaj.

Na Svečanoj akademiji dodijeljeno je općinsko priznanje „Maglajska plaketa“ Ömeru Eğılmezu, Generalnom direktoru kompanije „Natron-Hayat“ d.o.o. Maglaj, koji je dao veliki doprinos za unapređenje privrede na području općine Maglaj, a podržao je i brojne projekte iz oblasti: kulture, sporta i obrazovanja.

Također, općinsko priznanje „Maglajska plaketa“ dodijeljeno je i Općinskom štabu civilne zaštite Maglaj-Jedinici za asanaciju terena iz perioda 1992-1995. godine, koji je dao doprinos razvoju civilnog društva i saniranju ratnih šteta na čelu sa Smajom Šahmanom, komandirrom.

U muzičkom dijelu programa učestvovali su mališani JU Dječiji vrtić „Maglaj“ i mali hor Osnovne škole „Maglaj“.

Nakon Svečane akademije, upriličena je izložba „Maglaj u zavičajnom fondu“ u organizaciji Opće biblioteke Maglaj.

Prije svečanog programa, delegacije su položile cvijeće na Centralno spomen-obilježje u Parku ljiljana, te na biste narodnih heroja Petra Dokića i Sulejmana Omerovića Cara i prvoborca Ibrišima Obralića.





OPĆINSKI NAČELNIK MAGLAJ ČESTITAO ROĐENDAN DJECI ROĐENOJ NA DAN OPĆINE

Mirsad Mahmutagić, Općinski načelnik Maglaj, na prigodan način čestitao je rođendan djeci koja su rođena 18. septembra kada se obilježava Dan općine Maglaj, a rođena su posljednje dvije godine. Džana Kapić i Layla Memišević rođene su 2022. godine, a Nejra Sijahović rođena je 2021. godine.

Općinski načelnik Maglaj poželio je djevojčicama dobro zdravlje, sreću i uspjeh, te istaknuo da Općina Maglaj nastavlja sa tradicijom darivanja djece i narednih godina povodom Dana općine.



OTVORENA MANIFESTACIJA „SEPTEMBARSKI DANI OTPORA 92-95“

Danas je Mirsad Mahmutagić, Općinski načelnik Maglaj, otvorio manifestaciju „Septembarski dani otpora 92-95.“ i istaknuo značaj obilježavanja datuma iz historije općine Maglaj. Također, naglasio je da je svaka godina rata u Maglaju bila herojska i da o tome svjedoče sve bitke koje su osvojene.

Adnan Sirovica, ministar Ministarstva za boračka pitanja Zeničko-dobojskog kantona, u svom obraćanju naglasio je da je Maglaj iz ratnog perioda izašao kao treći grad po razrušenosti, te da je važno čuvati tekovine odbrambeno-oslobodilačkog rata.

Nakon zvaničnog dijela, položeno je cvijeće na Centralno spomen-obilježje, kao i na spomen-obilježja: Trg Alije Izetbegovića, spomen-obilježje prvom šehidu Rifatu Abidoviću, šehidsko mezarje Podborik, spomen-obilježje civilnim žrtvama rata, spomenik Čakalovac i spomen-obilježja u Novom Šeheru.



AMBASADOR JAPANA U BIH POSJETIO OPĆINU MAGLAJ

NJ.E. Kinefuchi Masami, ambasador Japana u Bosni i Hercegovini, posjetio je danas općinu Maglaj i prisustvovao primopredaji vozila hitne medicinske pomoći koje su donirali JU Dom zdravlja Maglaj.

„Mi želimo odgovoriti potrebama građana Bosne i Hercegovine, na tome je zasnovan i ovaj projekat, koji će olakšati građanima općine Maglaj. Tu smo da realiziramo različite vrste projekata i da doprinesemo unapređenju života u Bosni i Hercegovini“, rekao je NJ.E. Kinefuchi Masami.

Mirsad Mahmutagić, Općinski načelnik Maglaj, zahvalio se na svemu što je Ambasada Japana učinila za Maglaj, te istaknuo projekte koje su do sada realizirali.

„Ovo je značajan projekat za građane Maglaja, dva moderna vozila koja će itekako koristiti Domu zdravlja Maglaj“, naglasio je Općinski načelnik Maglaj.



Tanja Radoš-Kosić, ministrica Ministarstva zdravstva Zeničko-dobojskog kantona, istaknula je da će projekat prije svega pomoći u spašavanju ljudskih života.

"Projekat je značajan iz mnogo razloga, ali najbitnije jeste da će pomoći u spašavanju ljudskih života. Japan sinonim za inovacije i predanost, a ovim putem su dokazali da su humani i odgovorni", rekla je ministrica Radoš-Kosić.

Nejra Nalić-Medžić, direktorica JU Dom zdravlja Maglaj, kazala je da su ova vozila vrijedna za građane i unaprijedit će efikasnost pružanja pomoći pacijentima.

„Mi sa jednim vozilom mjesečno prelazimo između devet i deset hiljada kilometara, dovoljno govori kolika je naša potreba za ovakvom donacijom. Vozila su namijenjena za sanitetski i hitni prijevoz, te imaju opremu koja će doprinijeti životno ugroženim pacijentima“, istaknula je direktorica JU Dom zdravlja Maglaj.

Ambasador Japana u Bosni i Hercegovini je nakon prijema u Općini Maglaj i obilaska JU Dom zdravlja Maglaj, posjetio i maglajsku Tvrđavu.



OTVORENA SPORTSKA SALA U MJESNOJ ZAJEDNICI LIJEŠNICA



Mirsad Mahmutagić, Općinski načelnik Maglaj, danas je otvorio sportsku salu u Mjesnoj zajednici Liješnica, koja je izgrađena u okviru projekta „Jačanje uloge mjesnih zajednica u Bosni i Hercegovini“.

Fahir Salkić, predsjednik Vijeća mjesne zajednice Liješnica, rekao je da će sportsku salu moći koristiti svi mještani, od najmlađih do najstarijih, te da je ovaj projekat od izuzetne važnosti za mjesnu zajednicu.

Općinski načelnik Maglaj, istaknuo je da ga uvijek raduju projekti koji doprinose poboljšanju kvaliteta života u mjesnim zajednicama.

Projekat „Jačanje uloge mjesnih zajednica u BiH“ se fokusira na podsticanje lokalnog razvoja na čelu sa organima mjesnih

zajednica, jer upravo mjesne zajednice imaju ključnu ulogu u posredovanju između svojih građana i lokalne uprave.



ZAKAZANA 31. REDOVNA SJEDNICA OPĆINSKOG VIJEĆA MAGLAJ

Trideset prva redovna sjednica Općinskog vijeća Maglaj bit će održana u petak, 06.10.2023. godine u sali Općinskog vijeća Maglaj sa početkom u 15:00 sati. Predloženi dnevni red sadrži osam tačaka, te vijećnička pitanja i inicijative.

Općinsko vijeće Maglaj bi trebalo razmatrati: Izbor rukovodstva Općinskog vijeća Maglaj: a) Prijedlog Rješenja o imenovanju predsjedavajućeg Općinskog vijeća Maglaj, b) Prijedlog Rješenja o razrješenju zamjenika predsjedavajućeg/dopredsjedavajućeg Općinskog vijeća Maglaj, c) Prijedlog Rješenja o imenovanju zamjenika predsjedavajućeg/dopredsjedavajućeg Općinskog vijeća Maglaj, te Nacrt Poslovnika o radu Općinskog vijeća Maglaj.

Također, predviđeno je razmatranje: Prijedlog Odluke o imenovanju jednog člana Općinske izborne komisije Maglaj, a) Prijedlog Odluke o davanju prethodne saglasnosti na prijedlog Rješenja o razrješenju člana Nadzornog odbora Komunalno javnog društva d.o.o. Maglaj, b) Prijedlog Odluke o pokretanju procedure izbora i imenovanja jednog člana Nadzornog odbora Komunalno javnog društva d.o.o. Maglaj, c) Prijedlog Rješenja o imenovanju Komisije za izbor na upražnjenu poziciju u reguliranom organu Općine Maglaj (Komunalno javno društvo d.o.o. Maglaj), Plan i program održavanja sistema javne rasvjete sa finansijskim pokazateljima za 2023. godinu, Izvještaj o održavanju i sanaciji javne rasvjete sa finansijskim pokazateljima, Izvještaj o implementaciji Strategije razvoja Općine Maglaj 2021.-2027. – Izvještaj o razvoju za 2022. godinu, te Informacija o realizaciji preporuka revizije Općine Maglaj za 2020. godinu.



U septembru 2023. godine
na prigodan način upućene su čestitke povodom:

* Čestitka povodom početka nove školske godine

*Dana općine Maglaj